

# Hipru

## Honi Tombaiva Geinna Hiprunindmba, Sesoava Ishovna Ombolnashara.

---

**Sesoana Ombolva Hevm Nengthalnonoamendekli.**

**1** <sup>1</sup>Nemetva humeinmba doarava Sesoava moamba ishuvna pina tomonalmba hevna moashulnindnashara. Himba elsus lotho iavna, os vinvnamba, os vinvnamba, indakonda wevsana. <sup>2</sup>Wo daipotava hona nambainam, pivva nengviluwulv, ovimba pethaimba imharavhowolvav, Sesoava doa ishuvn pimba hevna ombolnashara. Aralva ombolnana vena pethamba, wo doa himba osoa hevna ombolmba wohkihpihana, manam manam honam vaohotholm. <sup>3</sup>Wo ombolva pusamba vethana woklamsna Sesoanamba, wo pim lavhoaluhunv. Himba aimund ambo snal, Sesoa hev ten avm. Manimani memba Sesoava vewol venamba, ombolva kekaiv ilohv mongawatilm hevna keknasowolmona. Ombol kilumbshuawol vevna pimba sahaposwonindmba, wuvolmba almba. Wo doa himba av Sesoana nihanasis, mendekli king kuwulinda senakembellini.

**Sesoana Ombolva Mendeklinonoa, Ovsongolnindva Owai.**

<sup>4</sup>Ombolva mendeklinonoa, henga he kuvhoawol vev ovsongolnindmba, wo Sesoava hembra nihilva vraohna, noi snal mendeklinonoa, henamba kuvhoawol vinvna. <sup>5</sup>Honamba memba, noinda Sesoava osva ishomnavnamao mongomba ovsongolnindrinimba osva,  
Yimba kana ombol. Daipotava kava os ov, kava yena aral lohv.

*Buk Song 2:7*

Wo henga hev onam,

Kava si hena aral wohlohvav, wo himba si wohlohvav kana ombol.

*2 Samuel 7:14*

Hona moarava Sesoava aralva Kristusmba nihilva mendekli vrahona.

<sup>6</sup>Wo nonamba Sesoava hevna yiveltowondmba ombolmba waiprovnamba hona petharamba, himba os ona, wohposvhoara yunalm Sesoana ovsongolnindoa, hembra okuluvmona velmba.

<sup>7</sup>Men honam osm Sesoava ishunvna ovsongolnindmba, Sesoava kekaiv vena hevna ovsongolnindmba vuvimsna. Himba hembra hevna andranindmba tuhpiawol vena suwemdamsna.

*Buk Song 104:4*

Memba osm, keknasowolva henamba Sesoanaminiangas prunvna, heva os ombolva hevna keknasowolna wohlohvna.

<sup>8</sup>Heva os Sesoava ishomnana honam osm hevna ombolmba, Yimba Sesoa lohv, yimba si king kuwulalm wohavav yunalm yunalm. Yimba si kuwul wulluhunvav pevtindimba, wo os yimba si lehra lohohra lesvhoawol vevav. <sup>9</sup>Yimba und vev besal wevsamangas, sahoklalmba ovov. Wo noinda kava arapevpa yemba kikih vrena, nom kuwulm wulluhunilm, owapevriniva mongova owai, kava omnanamoa. Noinda yimba mindnamba undva kanandhav.

*Buk Song 45:6-7*

<sup>10</sup>Wo Sesoa vena, os omnana hevna ombolmba,

Mendekli, manimani suvevnamba, nemetva ye vena pethamba. Wo ye vena englana ovmba. <sup>11</sup>Wo hembra si mueisowa vewolvav, heva os yimba si wohavav yunalm. Hembra si malokolol samblamsna lelao vewolvav. <sup>12</sup>Yimba si pepetowolwolvav kayen tokolmsna. Yimba si vewolwolvra pikianmsna, nomba vethavra, nomba selvlahavra. Wo heva os yimba pevmba es eva weihaloh vrevav?

Wo yenamba almba yunalmba si huti vevavmoa. *Buk Song 102:25-27*

<sup>13</sup>Wo heva os Sesoava doava omnanamoa mongomba ovsongolnindrinimba osva,

Ovhoao hui kana nihanasis, verava, kava yena ungundmba slowothovav yena pevna englisram.

*Buk Song 110:1*

<sup>14</sup>Heva os ovsongolnindva ivtovolva, himba andra viniv Sesoam, wo hev hembra wolawollohv, nom kolvrowolalm, hem nom he si henga lopshavvm.

### **Pimba Hengamba Lopshalmba, Hevm Mendeklinonoa.**

**2** <sup>1</sup>Sesoana ombolva nihilva mendekli vrana, noinda yeoa mindnam ambo novnavhora engivm, nomoa temba pimba numha vrevnamba Kristusnanamba. Wo osva yimba si phopiavramoa moanonoariniva.

<sup>2</sup>Manara, nomba moamba, temba Sesoava pina tomonalmba ishunvnamba ovsongolnindnanamba, doa doara ambara levraholothunna pina tomonalmba, osmba tanam. Wo himba nomba mongova engmba owai vevna, hellelmba owai vevna, doa kinmba vrana nonalhrava, temba hevpa sahonamba vevnamba. Pimba honamba nonora av piv.

<sup>3</sup>Heva os nemel moanonoava, pimba nonamba lopshalmba, mendekli hev. Wo noinda ova tanam pimba si kinmba vrvira, pivva ova allava, ovra, owai, ambo gekala uv honamba.

Yesus mendekli hev honamba nemelmomba seilva ishona, monakoklarinimba lopshalmba, wo moalamangnindva nomba temba hembra hella vrvnamba, pim indkumbim wohlihalm vinna, osm hona lopshalmba monakoklariniva tanamolnam. <sup>4</sup>Sesoava eva hevpa os venata, ambaram levrahlothona, osm tanam memba moanonoa, honana vena, mendekliandrana manana manana. Wo eva nona hev indhanam moainal wohdaswolvnamb hevsongolnashara, os hev ten und wohvrevnam.

### **Kristusva Wohnilhakohana Indhanarinielm.**

<sup>5</sup>Sesoava pusvund venamoava ovsongolnindmba, kuwulmba wulvahalmba petha nemelmba, memba pivva nengviluwvpa, owai. Memba nom dawonam petham, kav yem ten ishunvnamb. Heva os himba hevna ombolm onengmanavna, honam andram velm. <sup>6</sup>Ten mongona Sesoana tombaira moa novol velohvmb,

Sesoa, mani kava mendekli avma. Manaram yimba popeng vewol vev indhanamba? <sup>7</sup>Mani wenokombawonamma yimba kamba desvhoana ovsongolnindna anglasingiva. Heva os yimba kamba mendekli nihilva vraohna, yimba kamba wulovongovna. <sup>8</sup>Yimba slowothona manimani kana anglasingi. *Buk Song 8:4-6*

Wo ova Sesoava slowothona manimani indhanana anglasingiva. Wo huiva vavawonamba, owai mana vemava ombamba lohvmoa, ova himba kuwulva wulvahunvmoa. Wo heva os owai, mendah pimba nunglivmoa ambarava, ova he kuwulva wulluhunv, nonamba manana manana. Heva os Sesoa doa Kristusmba pusvundthoana, hona andramba velmba, pina indhana indkumbina vuhera.

<sup>9</sup>Tanam, nemetva ambo tovolahana hutewonam, Yesusva luhunna ovsongolnindna anglasingiva, nonamba himba indhanarinielm lohvnamb petharava. Heva os daipotava pimba nungliv hembra, king kuwulna gol topi holothov, pusamba vethalm, eva okolalm, manara noinda kin guanamb, eva dahanamb. Manara noinda Sesoana wavrara hembra noinda daheinna indkumbimba. <sup>10</sup>Sesoava manamb manamb hengas vena, wo hena hevelm wohlohv. Wo noinda himba lehra undva vrena, indkumbimba hevna towandalmba wonalm vev hevna kembellamb hevna pusambanakambara. Sesoava doara undva vrena, ova Yesusva si indhanamba lopshavav, hevpa os hevpa si kinmba nihsesoanahonamb vravav. Wo no nihsesoanamba Sesoava engla wuleihawolvna, henomba temba kuwulva deisumbingavpa indhanamba monakoklarininapenamba senakembellamba.

<sup>11</sup>Pimba nonora av, Yesus indhanamba kekaiv vev, Sesoanangas alm, wo nomba temba kekaiv vevpa Sesoatindimba, himba nomba yunam mongawapendarini. Wo noinda osva himba lou vevnamoa, sevelolmba hembra, osva, kana towandasla. <sup>12</sup>Hev Sesoa aram ishonnana,

Ara, kava si ishunvra no yetindimba yemomba. Kava si yemba okolavra kavna towandaslanamusrava, nonamba yetindiva yemba kusomnavrava, sembayang venalmba. *Buk Song 22:22*

<sup>13</sup>Hev vena, os unna,

Kava Sesoa aram hehga venav, nom hev ten kam ovlahamnanam, venalm. *Aisaia 8:17*

Wo osoa hev vena, os ona,

Kava men otovotalmba wonav, nomba temba aramba kaindava sandhanamba. *Aisaia 8:18*

<sup>14</sup>Nom otolm maimba Yesusva temba unvna, mundilm tendona onganam, hevna nihilnahonam men avnam. Wo Yesusva eva hevpa osta nilhanata, nihilva snal ilohvna, ten he avnam nona. Himba honamba osm memba vena, hembra dahavav, wo hona monana himba indkokla vrevav indhanarinimba, henamini phov, osmba vev, os gav, os gav, indhanamba dalalmba. Himba nomba yunam Setan.

<sup>15</sup>Yesusva indhanarinimsna nilhanamba, wo daha, osm himba doa kilumbshuawol vena hembra. Himba os avna, ovna, ombandhana andranind Setanna, manara noinda elsus himba pem vivna dalnapenamba. <sup>16</sup>Tanamangas ovsongolnindva nomba owai, temba Yesusva kolvrowol venamba hembra, heva os indhanam, nom ten Sesoam amnavm, Aprahamna undnamsna.

<sup>17</sup>Yesusmba kinmba opramnavna osva i. Honamba mongal wevsava hena towandaslalmba vinvnamba, hembra eva os venavnata. Wo no kindava himba wohnilhakohana sembayang andranindna kuwulmsnamba, himba si wavra vovhueinvav pimba sahaposwonindmba. Wo eva himba si wohengvav Sesoana aralna moamba, nonamba himba andrava venavrava, memba andrava, kilumbshuawol velm sahaposwonindm. Wo osva Sesoava si hembra hengava wusprunvavmoa hevna sahaposworava. <sup>18</sup>Wo daipotava doa himba pim kolvrowol vev, men mana vemara eiswol vewol velm vevm. Manara, eva himba kinmba nihsesoanahonam vranata, wo newondmomba hembra sihamnana, osm noinda indkokla vera.

### Yesusva Kuvhoana Henga Mosesmba.

**3** <sup>1</sup>Seh, yeoa ningminivm Yesusm. Yemba doa englava siheinna Sesoava hevtindilmangas. Sesoa wolaihaprinna Yesusmba pimba, wo himba sembayang andranindna kuwulmsna wulluhunv pim, wo himba

wulprunna pimba nemel Sesoana moamba. Pimba doa os una, pimba keknam undnahonam amnav hembra. <sup>2</sup>Wo Yesusva wohvevna manimani nomba temura, Sesoa hev ten omnavnam, os ten Moses vevnam. Mosesva vevna manimani temura, Sesoa hev ten omnavnam, vinilm hevtindim, nom Sesoana doaraminimom wohengivna. <sup>3</sup>Indhanariniva kuwulva temba wulluhunvpa hevtindinamba, annind, annind hemangas longong ovriv mindnamba, owalmba ambo snakand. Eva osta Yesusmba. Wo noinda Yesus kuvhoana nihil mendeklinamba henga Mosesmba.

<sup>4</sup>Kuwulva hindtindina hindtindina os indakonda vilunv, wo heva os Sesoangas manana manana kuwulva wuleinv. <sup>5</sup>Mosesva temura andrava vinvna Sesoatindimba, nomba Sesoava omnavnamba hembra velmba. Himba nom ishunvna, sewonamba si Sesoava os ishovra. <sup>6</sup>Wo heva os Kristusva keknam wohlohvna Sesoana hevna ombol, he Sesoatindina kuwulva wulluhunv. Wo pimba tanamba avavta Sesoatindilmba, pivva osva allava keknamba undnahonamba, wo nengviluwuvra, vuhembra besalva, Sesoa doa pimba ovlahinna.

#### **Pioa Wohviluwulkovlohra, Yesusm Dandm Engalm.**

<sup>7</sup>Hillu, pioa daipotaoa engalvohra Sesoasongolm. Himba os ona, Daipota hillu, nom ten Sesoa ishunvm yem. <sup>8</sup>Manam yemba alhwol vevra, osva nemetva simbehumunpevpa temba vivnamba, nonamba himba henga meis hehara omnavna kamba. Di himba sahalpethara temba kamba vinivnamba, osmba verava, ora kam ovunv noinda? <sup>9-10</sup>Tahonmba 40pelara lohva diva sahalpetharava, yena simbehumunpevpa nunglina, nomba manam manam kava vevnamba. Wo heva os himba kam umnivna, osm ora pim honinda ovunv? Wo kava mindnam wusprunvna hembra, wo kava os ona, himba kalmba avmoa keknamba. Yimba doava levrapivolvmoa kana monamba. <sup>11</sup>Wo noinda kamba wusprovna, wo ongawola lahinvna, yimba si owaimomolmba saivvavmoa kana ehapetharava.

*Buk Song 95:7-11*

<sup>12</sup>Seh, novkalana avm, osra ata ye mongo homeis und koholotho vrevm, keknamba loholmba owai vevra. Honi si ollawol vevra yemba, engalmba Sesoamba, nomba temba wohavpa. <sup>13</sup>Heva os sia okomba nonam nonam, yeoa pevmoa suwenamandna ovrevm. Vewuvm honaoa ambo elsus. Akolvra vevm, osm mongova yeriniva si homeis puehálnindriniehm lohvm, wo und koholotho vrevm, manara, sahaposwona bumbrisilla. Ata yimba os maim nengvra, mani eva lohv honindava? Heva os Sesoava yemba mendah nengvewolowov.

<sup>14</sup>Pimba indkumbiva av Kristusna sehel. Honamba memba tanam, pivva osangasva allava, osva verava, eunillam keknam undnahonamba,

noi ten seilm doara piv nona anam. <sup>15</sup>Sesoana doaramini tombaimorava os novol velohv,

Deti hillu, nomoa himba temba ishovpa. Manam yemba alhwol vevra, osva nemetva temba nonamba yenamba simbehumunpevpa meisva sahonamba hehara omnavnamba sesmba Sesoamba.

*Buk Song 95:7-8*

<sup>16</sup>Anmund himba nomba osva Sesoana moalamangmba hillinamba, wo henga meis hehara omnavna? Indhanamba noi, temba Moses ten wonphonam Isiprini, pina simbehumunna tomonalna. <sup>17</sup>Wo Sesoava anmundm wusprunna, osva venamba, tahonmba 40pelara lohvna? Himba nom wusprunvna, ten indkokla vivnam sahonam, wo hembra ninda sihavna di sahalpetharava. <sup>18</sup>Wo anmundm Sesoava ishunvna, nomba himba temba osva ongawola lahinvnamba, himba si saivvavmoa kaindava, eha vewuvulmba? Himba ishunvna pina tomonalm, nom ten hellelm owai vivnam hem. <sup>19</sup>Wo doa ambara men ambo osva nungliv, hembra numbulnamoa, saivolmba, vralmba Sesoana ehavuhemba, manara ninda himba keknamba undnahonamba avnamoa.

**Pivva Honamba Pethanindva, Membra Pivva Avpa Sesoanamba,  
Si Saivra Vuhemba, Eha Vewuvulmba Senakembella.**

**4** <sup>1</sup>Doa Sesoava pimba ovlahinna, osva pivva eva si saivrata, hena eha vewol vuherava. Wo pioa ambo pepehna vivra, osra mongo pirini si homeis owolakohavm ehavhoram. <sup>2</sup>Pimba hillivna besal nemelmomba, os ten nemet Israelnindm vinvnam. Wo heva os nomba moamba himba hillivnamba, hembra kolvrowol vevnamoa. Himba hillivna, heva os owai, vrevnamoa undnahonamba. <sup>3</sup>Pimba nomba membra avpa undnahonamba, si saivvav, wo aevulvra Sesoana ehavhora. Heva os nemet Sesoava ten ongawolnam hindm, nom ten henoi wuleihivnam, alm undnahonam,

Wo kamba wuspronamba, wo ongawola lahinvna, unna, yimba si saivvavmoa kana ehavhorava huiva petharava. *Buk Song 95:11*

Tanam honamba moamba ishona, nomba manam manam temba phonamba Mosesna novrava. Heva os pivva nonora av, nemetnonoava, nonamba Sesoava vevnamba pethamba, himba nonam wohvepiana andrava hevnamba, wo doa engla wuleihawolna, ambo avna hevna ehavhorava.

<sup>4</sup>Noinda mongova men Sesoana doaramini tombaimorava lohv, himba ishonamba saptumomba, ona, kava kavna andrava doa wohvepiana, mongavhora vah iana sapturamba. <sup>5</sup>Wo heva os doa pimba honamba moamba hilli, Sesoava os ona, himba si saivvavmoa kana ehapetharava. <sup>6</sup>Noinda pimba nonora av, osva si monglava saivvav, wo avav Sesoana

ehavhorava. Wo heva os nemetva temba himba hillinamba hesnamba, osmba beswonamba almba, owai saivnamoa. Himba saivnamoa, manara, himba wohengivnamoa. <sup>7</sup>Wo doa Sesoa nengavnangm sesvho vrevna mongnanamba, os sevriv, deti. Himba ishona detimomba doa doara heva nemet Devitnana. Noi mongal tombaimomba, nemet ten kav yem ishunim.

Detiva hillu, nom he ten ishovm. Manam yimba kelsombovhova  
vivra.

*Buk Song 95:7-8*

Hona moarava pimba nonora av, daipotava pinamba mendah tuvpa velaihaluhunv, Sesoana ehavhoramba saivolmba.

<sup>8</sup>Pivva nonora av, osva nemetva Yosua deisumbingana Israelnindmba Kenanpethamangas, Sesoana ehavhoramba owai. Pimba nonora av honamba, manara, Sesoava ishona honamba henga mongnasimba detimomba nomba. <sup>9</sup>Wo honamba os nungliv, nomba ehavhomba Sesoatindinamba mendah sis prunv. Pimba os ningthiv nomba, vah iaevul okomba saptumba, honamba moamba ambo weihaloh vriv osm Sesoana senakembel. <sup>10</sup>Memba ambo osm, himba nomba sihallava Sesoana ehavhoramba, si eha vavovra hevna andrariniva, os ten Sesoa venam. <sup>11</sup>Homeista, pioa ehlana keknam alahmana velohra, Sesoana ehavhoram saivolm. Pioa lehalvohra, osnapenam, anvema si homeis no wevsam engvm, ten hanoi Israelnind mongla pilpikovvnam moam, wo plel venamba, doa himba owolakovvna.

<sup>12</sup>Hillu, Sesoana moamba indhanarinimsna lohv, wo andra wohvev hevnasowana. Nerawol lohwovl ovlakasmsna, nerawol lohwovl, os vei, mongnasis, sis. Wo heva os kuvhoav henga ovlakasmba. Wo piindamba nihmeramba wohsiheinv, dom ten und endvm. Dom hevm hovrahovram, kel ten kelvevm. Wo Sesoana moamba lesvhoawol vinv pina indakonda nengavnangmmba pina undrinimba. <sup>13</sup>Noinda mana vemava es eva kithavav Sesoana novhuiva, owai. Manimani ambarangas hena novsra. Wo yunam hemoa pioa temura ishumnivra, osmoa ora, os kava avna seilva.

#### **Yesusva Pina Mendekli Sembayang Andranindna Kuwulalmsna Luhunv.**

<sup>14</sup>Pinamba luhunv mendekli sembayang andranindna kuwulmsna, hehoni doa vongana senakembellam, pinavhoram Sesoana novram. Wo noinda osva pioa wohkevrlohra keknam honaoa, memba pivpa keknamba undnahonamba nonamba amnavpa hembra. Himba Yesus, Sesoana ombol. <sup>15</sup>Pivna sembayang andranindna kuwulmsnamba, himba pimba wavra vrowol vev, nonamba pimba indkoklava vivpa. Manara, himba temba avnamba petharava, hembra manara manara eva os lehawuvmona vevna, no sahaposworava, men piv avm, wo heva os himba indhanarini windel lohvna. <sup>16</sup>Noinda pioa amblohra pepehhuvi beswonam amballam Sesoana

novram, di ten hev no moainalvhora ovavho vevm. Di pimba si nunglivav, osva eva himba pimba undalm vewol vevta. Wo himba si pimba wavra vovhueinvav, pim kolvrowolalm, nonamba pimba und vivrava.

**5** <sup>1</sup>Yutanindna sembayang andranindrini mendeklimba, Sesoava puvundthoavpa, mongom nom indhanahovrinim, henom, ten andra vinvm, os vei, Sesoam, eva indhanam mongavhoralm. Wo nomba sembayang andranindrini mendekliva, himba dambroh vev indhanana innemba besalva Sesoam, wo eva tatamba wohwuweihamnav Sesoam, nonam indkoklam maisasa vewol vinilm. <sup>2</sup>Nomba sembayang andranindna kuwulva hevpa eva ambo indhanakoklarini lohvnata. Wo noinda oiwonapetamba vinv hindmba, nomba temba himba titnamba indkoklava vivpa, wo eva nom manimani ten sahonam vivm. <sup>3</sup>Hemba hevmba doa wohpelpena sahoklara, wo noinda himba alta sengsowarava tatamba wohwuweihamnav Sesoam, osm kana indkoklamoa maivethara. Wo eva hev vev, tatamba wohwuweihamnav Sesoam, osm indhananamoia indkoklamoa maivethinda.

<sup>4</sup>Sembayang andranindna kuwulalmba, indhanariniva loholmba vevpa, himba si noinda mendekli nihilva wulluhvav. Wo heva os mongova indhanariniva himba hevmba puvundthoavavmoa hona andraramba. Himba heva sihavav hona andrarava, Sesoana hevna moara, os ten Aron lohnam, Mosesna boasalal nemet. <sup>5</sup>Wo eva osta Kristusva himba hevmba puvundthoanamoia, mendekli nihilmba wulluhulmba, osalmba ovra, sembayang andranindna kuwul. Heva os Sesoa hembra puvundthoana hev. Sesoava hembra omnana,

Daipotava kava os ov, kava yena aral lohv.

*Buk Song 2:7*

<sup>6</sup>Wo mongona Sesoana doaramini tombaimorava Sesoava os ona,

Yimba sembayang andranindrini wohalm yunalm, sembayang andranindrini snal, ten lohnam Melkisetek.

*Buk Song 110:4*

<sup>7</sup>Mendahva huiva petharava Yesusva avnamba, himba wenamona mindnam sembayangmba vevandnam velohmanavnam aralmba. Ona, ara, kam lopslaho, kamba dahavavmoa. Wo hena sembayangmba wohhellangas vevna, manara himba ambo os ona, Sesoa, kava owai, mana vemava memba yimba kamba velmba venavpa, ambo yeinda lohv. <sup>8</sup>Yesusva Sesoana ombol lohvnata, heva os himba ambo kin guaomana vevna, nomba temba kinmba hembra promnavnamba, wo no monana himba osva vravna, kava wohengv arana moam. <sup>9</sup>Wo os Sesoava hembra englava wuleihawolna, luhunilm pina sembayang andranindna kuwulmsna besalnonoava. Wo himba lopshav monakoklariniva hindm, nom ten henoi hem keknam engivm. <sup>10</sup>Osoa doa Sesoava aivongo vevna Yesusmba sembayang andranindna kuwulalmsna, sembayang andranindrini snal, ten Melkisetek lohnam.



**Yeoa Wohavm Keknam, Yemba Eva Osva Wiki Vewol Vivra.**

<sup>11</sup>Kava esvema tevlanamsna moamba ningiwulav honamba, yemba ishunilmba. Wo heva os owai, manara noinda es eva temurava velokusathivav, noinda yimba mendah oiwonapetam velokusa vilimbv. <sup>12</sup>Yimba doara Kristusnindilmba doa lovahna, osm daipotaoa yeoa numhowol vivm monglamo. Wo heva os owai, yemba pevmba eva mongo heva prunvav, yemba numhowolalmba Sesoana mimirinina moanamba hengamba. Manara, yimba mendah hina av, nomba moamba vreinamo. Noinda yimba mendah av, os maim oi, tetm vev. Yimba mendah limbina, innemba nelmba. <sup>13</sup>Mendahva temba monglava wekal velohvpa tetrava, temba mendah otol lipuiel englarinimsna. Himba mana vemamba wiyerava avmoa, beswonamba almba. <sup>14</sup>Wo heva os innenamba hindm, nom ten doa hevna velgona avm. Himba doa doara lehawuvmona vevna, levrapivolalmba, osmba besalm eva sahoklalmba Sesoana novrava.

**6** <sup>1-2</sup>Yimba mendah hina av, wo noinda pioa wohweisvrehra, wohksavhoalohra moanonoana, temba pimba weihaloh vewol vevav os, pivva pivna velgona av. Hengava manam pimba nomba moamba doaraminimba oningvhuvav, nemetva temba pimba lihalmba vinivnamba Kristusmba. Hengava manam pimba pupul vewol vivra moanamba, osmba meis hehara uwilango sahoklarinioa, noindava temba suwekembellamba gavpa, wo amnavm keknam Sesoamangas.

Manam pimba hengava nengvhoanga ovuvav, Kristusmomba pona posvandalliniva, eva nomba englava temba huhlinvpa, eva pulvolmba pokamariniva, eva si lovahvav Sesoana wetatmora.

Pivva osvavellava, temba os, maim oi, boalgalna milukulnamba doangas wosalohgav, heva os deuvpa wulundthoavmoa. Heva os pioa pivna kelsra lohvhoprara. <sup>3</sup>Wo pimba Sesoava wohlundthoatava nonamba, pivva osvav si pivna kelsra lovahvav.

<sup>4</sup>Heva os monglamba indhanamba hevna velgonamba amba owai vellava, es eva si hengava hevmba weihaloh vewol vivav. Himba doa Kristusmomba hillina. Himba doa und kanandhaprana senakembelna awothowolna, wo himba Sesoasongolna av. <sup>5</sup>Himba doa levrapivolna, osvav snal besal Sesoana moamba, wo himba vreprana keknasowolva henamba hona pethariniva. <sup>6</sup>Wo heva os himba pewoleihitava Kristusmba, owai, monamba lohvmoa hengamba, osmba nomba pelmai vithivra, beswonam avra. Hona wevsanamba himba vevpa, himba hev lopethav Sesoana ombolmba krusera henga, wo himba ambo louwolm vinivna temba osvav Yesusmba indkumbina novrava muserava.

<sup>7</sup>Monglava indhanamba snal av pethamsna, maim oi, po ten elsus lolohvm nosra. Wo no petharava besal innemba phov. Indhanamba

nomba endhavpa osorava, wo noinda hembra wohlundthoavra Sesoana awothowolva. <sup>8</sup>Heva os monglava pethamsna indhanamba av, sopolalva weselposalva phov ilkokla, wo owai, pethakokla. Wo mani eva eukwonamma Sesoava si os ovav, mueisowa wohvera. Si indkokla vrevav Sesoava suwena.

<sup>9</sup>Kana sehpuina, daipotava kava yemba honi kinil moamba vrahunv. Wo heva os kava os nengv, yemba si indkokla vilovavmoa honindava. Kava os nengv, osm Sesoava yemba nom si monakoklariniva lopshavav.

<sup>10</sup>Sesoava indhanarinikoklava owai, himba besal, noinda himba si maivethinvramoa andrava yenamba, temba yimba viwul vevpa, eva und vivm pev hev, noinda yimba hevtindim kolvrowol viv.

<sup>11</sup>Kava indkumbim yemba ninginv, no mongawa andram wohviluwulkovalm, os ten pev wohavm. Wo yimba si tanam dumbvra vuhemba besalva, nomba pevpa keknamba undnamba ningvrava.

<sup>12</sup>Kava yemba ninginvmoa, osva aivo viu, owai. Os vivm, ten noi avm undnahonam keknam ambo. Yimba indkumbiva si vrapravav, nomba Sesoava temba ovrahunnamba.

### **Sesoava Tanamolmoa Ovrohona Aprahamba.**

<sup>13</sup>Sesoava moamba ovrohvnamba nemetva Aprahamba. Mongova hengava avnamoa, mendekli va kuvhoalmba Sesoamba, osmba ata Sesoava hena nihilm osevrata, moam hevnam nonam pemokaltha ovrelmba. Owai, himba hev, osevrana, nonamba himba Aprahamba ishomonvnamba. <sup>14</sup>Hev omnana,

Kava tanam yemba ishomonv, kava yemba si awothovav, wo yenamba si simbepolva mindnam phovav.

*Stat 22:16-17*

<sup>15</sup>Aprahamba indwonam osva amana vevna, nomba temba Sesoava omokaltha ovrenamba. Wo venamba, himba wohdombna, nomba Sesoava temba omnanamba.

<sup>16</sup>Indhanamba elsus viv, osva mongona ovalna nihilm osivrivm, henoi mendekli ten lohvm, nonamba moamba himba pemokaltha ovrelmba vevpa. Wo honinda osva lihev, nomba moamba tanam. Hengava himba hoanavho vrivavmoa nomba moamba. <sup>17</sup>Sesoava hevtindimba lihawolalm vevna nom hevna moam, osm tanamolnam. Himba lihalm vevna, osm hevtindiva si dumbvav, nomba himba temba ovrahunnamba. Himba undva osm vrinv, heoa beswonam levrapivolla, osm himba hevna undmba weihaloh vrevavmoa. Wo os Sesoava pemokaltha ovrena, hev ten ovrahunnam.

<sup>18</sup>Honamba mana vema samblava, es eva weihaloh vrowolvav. Sesoava es eva dasalmba ovov, nonamba himba ishovnamba moamba, wo es eva himba dasalmba ovov, nonamba himba pemokaltha ovranamba. Honamba mana vemava samblava pimba numhowol evev, henoi men

ambvm Sesoaindam, nouwalm. Himba deiswilv pimba, nengviluwuvulm, nom hev ten pim ovrahunnam.

<sup>19</sup>Nomba Sesoava temba ovrahunnamba pimba, wo pivva mendah dumbvmoa, nomba snamba maim ora, besal besi wenahonam, wanda ten dembhapuv vewol vevm, botm nonapopolm pethalm. Wo pimba undnahonamba noinda keknamba endvpa, manara, wemba nomba kleihalohv kayensis tuvra. Nomba kleihalohvpa diva moainalvhorava tempelduvrava senakembellava, memba osm, pimba Kristusm undnahonam keknam amnav, doa himba pimba kilumbshoawol vena pivna indkoklariniva. <sup>20</sup>Yesusva doa domba hesna pimba mi deisumbingana, pinavhoram luhunilm Sesoana novram. Himba doa wohnilhana sembayang andranindna kuwulalmsna, yunalm wohalm, os ten sembayang andranindrini Melkisetek lohnem nemet.

**Sembayang Andranindrini Melkisetekva, Himba  
Pim Numliheinv, Osm Kristusva Os Vev.**

**7** <sup>1</sup>Melkisetekva himba king kuwul wulluhunvna Salemkembelna, wo sembayang andranindrinielm wohlohmanavna Sesoam senaminim. Himba anongla evena Aprahamiva monara, nonamba Aprahamba king kuwulmba helvakomo vunganamba, henga os provna deuvram. Nonamba himba anongla evewolnamba monarava, Melkisetek phona, awotho Apraham. Yimba nonora honamba av pev doara. <sup>2</sup>Wo Aprahamba manimani nomba iprovnamba daosriniva, hovra powalwolvna 10pelara, 9pelarava hev m poavlahavna, mongal Melkisetekmba poavraohna. Melkisetekna nihilva pivva osm ambo weihaloh vriv, king kuwul wevsa besalna. Himba king kuwul wulluhunvna Salemna, memba yunam osm, himba king kuwulva lohv, indwonam beswonam alm. <sup>3</sup>Nomba tit viv, osva ani ani dihi Melkisetekna arali avaliva? Osva tit viv henotindirini, avalva hembra nonam lengna, wo henanam eva hembra dahana. Noinda Melkisetekmba os ningminiv, himba Sesoana ombolmsna lohv, henoi ten wohavm osangas yunalm, wo osva Melkisetekva sembayang andranindrinielmba yunalm wohandra vavov.

<sup>4</sup>Yea ningminu hona Melkisetekm, himba mendekli wohlohna. Apraham pina tomonal wohva besalva poavraohna Melkisetekmba, nomba himba temba dombnamba daosriniva. Men honinda pivva osva nunglina, Melkisetekva mendekli, Aprahamba owai. <sup>5</sup>Wo eva lohohmorava os ona, nomba temba Livaitindiva phonamba sembayang andranindilmba, heoa momongo ambo dumbunvra innena dinamba hevna mongawa Israelnindnanaoa. Himba mongawapendarini Aprahamtindita, heva os heoa hevna manimani hovra henga popowol vivra, vevra, hev m, eva Livaitindim. <sup>6</sup>Melkisetekva himba Livaitindiriniva owai. Wo heva os Aprahamnaminiva manimani himba

momongo poavrombol vevna. Wo he awothona Aprahamba, hembra snal, himba wulavna Sesoana moamba. <sup>7</sup>Pimba indkumbi osva nonora av, mendekli indhana awothowolva viv ombandhanamba. Wo osva pimba nonora av, osva Melkisetekva nihilva mendekli wulluhv, wo himba kuvhoav henga Aprahamba.

<sup>8</sup>Nomba sembayang andranindva Livaitindiva manimani poavrombol vinvna Israelnindnamba, heva os no sembayang andranindva indhana, ambo snal men piv, ten vev, avm mendah, eva sihavm. Heva os Melkisetekva himba poavrana Aprahamnamini, wo Sesoana doaramini tombaimorava osva novol velohvmoa, osva hembra dahana. <sup>9</sup>Temba hev Livai, he poavrombol vinvna manimani Israelnindnamba. Wo noinda pivva olhmomba olhv, osva nonamba Aprahamba poavraohnamba besalva wohva Melkisetekmba, Livaiva eva os venata.

<sup>10</sup>Manara noinda Livaiva mendah avalva lengnamoa. Heva os Livaiva doara nihmera simbelinda Aprahaminda livna, nonamba Melkisetekiva anongla evenamba Aprahamiva. Pivva olhmonamba olhv ambo.

<sup>11</sup>Lohohmomba indhanamba honi vrahunna, sembayang andranindna andraoa wohluhunvra Livaitindiraoa. Heva os hena moarava indhanamba kilumbshuawol venamoa Sesoana novrava, owainonoa. Wo osoa henga mongo prunvna, hembra andra vinilmba. Nom snam kava onginv, men Melkisetekm, snamba owai, Aronmba temba lohnamba, himba sembayang andranindna kuwulalm luhunvna Mosesna novrava. <sup>12</sup>Wo nonamba osva sembayang andranindrini indanam mongova provrava, eva lohohmomba henga weihaloh vrivrata. Kristusva Arontindirini lohvmoa, noinda osva himba indamoa wulprov.

<sup>13</sup>Kava honamba ishumniv memba Kristusm. Himba indanam mongtindirini lohv. Wo notindirini mongova owai, sihanamoa, sembayang andranindrinielmba, andra velmba alta sengsowaramba.

<sup>14</sup>Men ambara ambo lohv, osva pina mendekliva prinna Yutatindirini. Wo Mosesva sembayang andranindmomba osevrnamoa no hetindirini.

#### **Yesusva Snal, Ten Melkisetekkumbi Lohnam.**

<sup>15</sup>Wo honi doa muesa undullava lohvhona. Pivva men nungliv, os doa mongova indanam sembayang andranindrini proi, himba snal ten Melkisetek lohnam. Wo himba kuvhoawol vev Livaitindina sembayang andranindmba. <sup>16</sup>Himba sembayang andranindrinielmba, Mosesna lohohmomba hembra awonamoa. Manara, himba Livaitindirini owai. Himba sembayang andranindrinielmba hevna undna lohna, osm si yunalm yunalm os wohavav. Noinda himba keknasowolna lohv. <sup>17</sup>Sesoana doaramini tombaimorava, mehonam honi os omnana hevna ombolmba,

Yimba sembayang andranindrini yunalm yunalm, sembayang andranindrini snal, Melkisetek ten lohnam.

*Buk Song 110:4*

<sup>18</sup>Noinda pimba nonora av, osva Sesoava doa doaraminiva lohohmomba amballa velahana. Manara, pimba kilumbshuawol vevmoa. <sup>19</sup>Manara, Mosesna lohohmomba mana vemamba weihaloh vrevavmoa besalalmba. Wo heva os daipotava doa Seso pimba besal monamba vuenghinna. Wo hona monana pimba ambvra murapetamba Sesoaindamba, nemeltovm selthoalm.

<sup>20</sup>Osta hevm mendeklinonoa, osva Seso pemokalthana vrena, nonamba himba Yesusmba aivongo vevnamba mendekli sembayang andranindrinielmsnamba. Nonamba sembayang andranindrinitovpa hohlo vrowovnamba Livaitindiva, hengava mongova pemokalthanamo, owai. <sup>21</sup>Wo heva os Kristus hohlona sembayang andranindrinitovmsnamba Sesoana moarava. Sesoava os ona,

Kava doa omokalthana, kava hengava si kavna miva weihaloh vrevavmoa. Ye men sembayang andranindrinielmba wosambalothov, osmba yunalm wohalm.

*Buk Song 110:4*

<sup>22</sup>Memba honamba, osm honamba moamba, Sesoava pimba indhanamba vinna Kristusna andrana, Kristusva ambo hoanavho vrelm. Wo honi nemel moamba henga kuvhoav doaraminimba.

<sup>23</sup>Osta eva, nonamba mongomba sembayang andranindriniimba dahavnamba, himba henga viluwulkohanamo, andra velmba, osva sembayang andranindrini. Wo noinda osra esvema avna sembayang andranindva. <sup>24</sup>Wo heva os Yesusva wohav yunalmba. Himba si wuleihavavmoa, andra velmba osva sembayang andranindrini. <sup>25</sup>Wo noinda himba elsus wohlopshowov, nomba himba temba ambvpa Sesoaindamba heinda. Himba honamba vevav, manara noinda himba elsus wohav lihra, Sesoamba osahmanalm no indhanaindamba, nom henoi ten pepra vevm Sesoana novram.

<sup>26</sup>Lehra pimba sna indhanariniva luhunillava, sembayang andranindrinielmsnamba, pimba kolvrowol vevra. Himba dendalngas, himba indhanarini windel luhunv pihovrava. Himba indasvho luhunv pina sahaposworiniva. Wo he wohkuvhoawol vev ovsongolnindmba senaminimba.

<sup>27</sup>Himba snamba owai, temba monglava nomba sembayang andranindva doaraminiva anamba. Himba tatamba wohwuweihivna, weisumblolm alta sengsowarava elsus, miva hevna indkoklamsna, wo eva sismba indhana indkumbina indkoklam. Heva os Kristusva hevpa nengvnamo, osmba velmba. Himba mongawulm wohvena, yunalm wohloholm osangasm, nonamba himba hevm wohkihpihana.

<sup>28</sup>Lohohmoa pusvundthoawol vev sembayang andranindna kuwulalmba, henoi indhanarini, ten lohvnam indhanakoklarini ambo.

Wo heva os Sesoana pemokalthamomba prona sism lohohmorava. Vrena Sesoana ombolm, mendekli kuwul sembayang andranindrinielmsna. Wo no ombolva si wohavav yunalm, Sesoava doa engla wuleihawolna hembra, himba hevna velgona daipotava doa wohlohv.

**Yesusva Pina Sembayang Andranindrini Kuwulmsna Luhunv.**

**8** <sup>1</sup>Men hona moana plalva lohv, memba kava yemba ishunvpa. Pinamba luhunv sembayang andranindrini kuwulmsna, wo himba doa ovhoana nihanasis king kuwulna vuhera senakembella. <sup>2</sup>Pina sembayang andranindrini mendekliva andra vev Sesoana devvra sena, Sesoana vuherava. Himba andra wohvawomnav devvnonoara, sembayang venalmba, nomba devvpa Sesoa wohvena, mongova indhanariniva owai.

<sup>3</sup>Indkumbina sembayang andranindna kuwulna andrava luhunv, himba dambroh vev indhanana innemba besalva Sesoam, eva tatasowava wohwuweihamnavna, nonam indkoklam maisasa vewol vinilm. Wo eva pina sembayang andranindna kuwulmsnaoa eva os venarata Sesoamo. <sup>4</sup>Memba pinamba sembayang andranindna kuwulva luhunvpa, daipotava himba huiva petharava lohtava, ata sembayang andranindrinielmba lohtamo. Kava ishov honamba, noinda huiva men mendah lovahv, sembayang andranindilmba Livaitindiva, himba lohohmomba engiv, indhanana innena tatasowanamba dambroh viv Sesoam. <sup>5</sup>Wo andrava nomba himba temba vildavpa petharava, ambo lihvriv nom sembayangduvnonoam, ten senakembella lohvm. Wo nonamba Mosesva velmba vevnamba Sesoana lairduvmba sembayangdamba, Sesoava hembra ongawolana, omnana,

Ambo novnavhora vevm nomoa manam manam, yemba temba kava nethamnanamba nengavnangva diva doarava Sainai olorava.

*Kisim Bek 25:40*

<sup>6</sup>Wo heva os nomba sembayang andranindna andrava, temba Sesoava Yesusmba vraohnamba, mendeklinonoa, kuvhoav nomba andrava, temba deiswilnamba monglamba sembayang andranindmba Livaitindimba. Wo eva ambo osoa, nemel moamba, noi Yesus ten wulprunnam Sesoanamini hevtindiram, mendeklinonoa, henga kuvhoav kololmba doaraminimba. Wo eva nomba manam manam, pimba nemelmomba temba wulprunnamba, wohkuvhoawol vev doaraminimomba. <sup>7</sup>Osva verava, nomba doaraminimomba beswonamba pimba kilumbshuawol vetava, osva eva hengava manam nemelva oningvavmoa, owai. <sup>8</sup>Wo heva os Sesoava doa nonglana, osva sahonam viv katindiva. Himba os ona, Doa nambaiva mura prov, kava nonamba nemelva moamba vrevrava, nomba si luhunvav Israelnindm eva Yutanindm.

<sup>9</sup>Si osva owai, ora moamba, temba kava ovrahunnamba simbehumunilmba. Nomba nonam, kav kleiha iphovnam hem englana Isiprini. Wo heva os himba nomba pilpikovvna, wo kava noinda hemba meisva haravhueinvna. <sup>10</sup>Wo dawonamba kava si nemel moamba wonishovav Israelnindm. Kava si velaheinvav kavna moamba hena mira, wo kav vera, si novol vewol vinvra hena indmera. Kava si einvav hena Sesoa, wo himba si avra katindi.

<sup>11</sup>Indhanamba si owalmba numhowol vivramoa hevna aratindimba, lihalmba kamba. Honamba memba, noinda indkumbiva si kamba lihevav, eva snakolava avra, eva snamba bimbsnindva avrava yunalm, mongonamba si shamba lohvvavmoa. <sup>12</sup>Kava si maikumi vewol vevra hembra, noindava temba himba sahonamba vivrava. Kava hengava si oningvhunvvavmoa hena indkoklamba. *Jeremiaia 31:31-34*

<sup>13</sup>Sesoava honamba moamba os ona nemel, wo honana himba doaraminimba weihaloh vrena kololalm. Wo manimani temba kololva lohvnamba, andrava lohmanavmoa hengava hevnamba, doa hoai vilopiav.

**Sembayang Andranindna Kuwulva Doaraminiva, Nemetva  
Tatatovolna Sembayang Vinivna Sesoamba.**

**9** <sup>1</sup>Hona mimirinina moamba, lohohmomba sembayangnamba lohv. Indhana englana vina nomba sembayangduvpa lairna. <sup>2</sup>Noi mongal lairduvpa wohvina, kamarva sambla lohwoolvna. Mimirini kamarva no lairduvmerava, wo nomba kamarva os alvna, kamar kulohol. Wo diva merava noi nalohvna lampu, eva meya rotinahonam, noi ten Sesoana novsra nalohvnam. <sup>3</sup>Wo meissisva kovopieinamba, mendekli kayen kiliheina, wo meissis mongo kamar lohvna, nomba os alvna, kamar kuloholnonoa. <sup>4</sup>Wo diva no kamarrava noi nalohvna, golsengva, nosram tinenalsowam vewuvulm, teihnung besalm pivialm. Eva osoa peti, nom himba hengava nengvhoalvohvna Sesoana lohohmomba, nunglivnamba nomba. Wo nomba petiva doara wohgothueina golna. Wo no petimerava honi yihlohvna, vena sospan golna, mana sungulvna, eva Aronna ala yithalohvna, alamba noi ten seilm nil wulphonam. Wo eva osoa diva merava honvava sambla, noi ten lohohmoa doaramini ten noinda novol velohwolvnam.

<sup>5</sup>Wo no petina kewulsvava ovsongolnindrini samblamsna elohwolvna, hevna anglalva mera evethawolvna nomba kewulva, diva temba Sesoava onamba, noindam tovolm sovhohola vawolm, Israelnindm nonam kilumb shuawolalm. Wo osva Sesoava si hembra hengava wusprunvvavmoa hevna sahaposworava. Wo heva os kava manam eva ata temurava honamba popaiha vrevav detiva.

<sup>6</sup>Manimani diva no lairduvmerava hona wevsana huhmoh vrina. Wo doa sembayang andranindva vesuv velvohvna no mimirini kamarramba elsus sembayangmba. <sup>7</sup>Wo mongona kamar kuloholnonoarava, sembayang andranindna kuwulangas vesiha vevna, wo himba os velohvna no tahonnam mongawulm, no tahonnam mongawulm. Himba nisva vesiha vevnamoa, himba heva tovol longaisiha velohvna. Himba longraohvna nomba tovolva Sesoam, vevna, hevma, eva indhanana indkoklam. Men nomba indkoklava indhana vivpa, osva nowolva vreivavmoa, osva kava memba indkokla viv.

<sup>8</sup>Sesoasongol honamba vrinv pimba, nethalmba, osmba nonamba nomba lairduvpa mendah lohvna, monamba owai lohvnamo, osmba pivva saivra kamar kuloholnonoaramba, Sesoaindamba murapetamba. <sup>9</sup>Honamba memba lihinv pim daipotamini, wo nomba os nungliv, manimani nis ambo wulpromnav, eva daipotava temba altasengrava wohwuweihimnivpa Sesoamba, owai, sembayangnindmba nomba hevmba kanandhowol vevavmoa, noinda hevpa os ningvav, osva kava mendah indkoklanahonam aevulv. <sup>10</sup>Manara honamba lohohmomba ambo pimba numhowol vev nom, innem, pom, eva poram ahalalm, osm beswonam avra Sesoana novrava. Wo heva os lohohmomba nomba lohv ambo ambaram tovollam, undramba sihavmoa. Himba engalmba yunalmba vewuvav, verava, Sesoana nemel nambai phora, Kristusm sembayang vewuvmonalm.

### Sembayang Vivm Hona Nemelmona.

<sup>11</sup>Wo heva os Kristusva doa prona sembayang andranindna kuwulalmsnamba, nom osm manimani besalngas pivva avpa nona huiva, temba Sesoava pimba nemelva moamba ovrahunnamba. No lairduvramsna himba sihanamba senamba, mendeklinonoa, wohkuvhoav doaramini lairduvmba petharinimba. Wo owai, indhanamba englanamba vinamo, manara, eva hona petharinima, owai. <sup>12</sup>Kristusva sihana Sesoaindamba mongawulmangas, wo himba englanamba lungi sihanamo memena tovol, eva sapi otolna tovol, osva nemetva temba sembayang andranindna kuwulva velvohvnamba. Himba hevma hevna nihm kihopiana hevna tovolna. Himba sihana Sesoaindamba, pim kilumb shuawolalm, ambo osangas honaoa lotholohvra yunalm yunalm.

<sup>13</sup>Doarava os vivna, vevna, memena tovol, sapina tovol, sapi avalna somovtov velanglalna weihla vevna indhanam, nom ten sahonam avnam, wo honamba osm vivvna, henga besal nemel ara Sesoana novraoa, tovol velanglalnana nihraoa. <sup>14</sup>Heva os Kristusna tovol henga mindnam wohkuvhoav nomba. Himba hevma nihnahonam wohophona, wo Sesoasongolnapopol himba hevmba wurahona Sesoamba, osva ona, kava men indhanarini besalnonoava. Noinda hena tovol si



pimba kilumbshuawol vevav, wuvolalm alm Sesoana novra, vera undram eva ambara nihram. Wo pivva si osva beswonam sembayang vinivra Sesoamba, henomba wohavpa yunalmba. Manara, pivva osva ningvavmoa, ora pimba indkoklanahonam av.

<sup>15</sup>Noinda Kristusva nemel wulprunna moamba Sesoanaminiva hevtindimba. Hindmba nomba temba Sesoava kekaiv venamba, doa hembra wohlundthoav awothowolnangas, os doara Sesoa hev ten ovrahunnam. Honamba awothowolva si yunalm wohlohvav. Himba si os wohavav yunalm, manara, Kristusmba dahana, osm indhanamba temba avnamba doaraminimonamba, himba hembra si kilumbshuawol vevav.

<sup>16</sup>Sesoava nengavnangva os vrena, Kristusmsna dahara, wo os Sesoatindimba si awothowol vevav Sesoava. Yimba nonora av, osmba nonamba indhanariniva nengvrava, osva si kamba dahavav sewonamba, wo himba verava, tombaira novol vewol vevra, osmba henoi si vaohothovav manimani kanapuwulva. Wo doa no indhanariniva nengvrava, vaohotholmba, nomba manimani no henapuwulva, heoa hevmoa ambara vithinda indhanamoia indkumbim, osm aralva hona wohnama doa tanam doara wohdahana.

<sup>17</sup>Tombaimomba nomba ombam ambo nonamba, osmba indhanariniva mendah lohvra. Honamba vivra, nonamangas hembra dahavrava sism.

<sup>18</sup>Osrata, tatamba luvnamba, wo tovolva longwol vivnamba. Hona monana himba seilva tumbuvulkohana doaraminimomba. <sup>19</sup>Boasna Mosesva ishunna indhanamba, nomba yunalm moamba lohohmonamba. Hengava himba vrvana sapi otolna tovol, wo yuhoh vrevna ponahonam. Wo doa hev vena, memetovol dombna, sipsiptal aambul, hisopklal tovovrena, noi velwohanamba, di tovolpora no velsongopona vena, lohohmom tombaim, eva indhanam indkumbim velanglalna weihla vevna. <sup>20</sup>Wo hev unna,

Honamba memba tovolva, honi seilva tumbuvulkohav moamba,  
 memba Sesoava yemba wohtvpa, engalmba. *Kisim Bek 24:8*

<sup>21</sup>Wo eva osangasta ambo, Mosesva Sesoana lairduvmba tovolna velanglalna wena vevna, nonahonam manimani, ten noi mera di nalohvnam nomba sembayangduvmera. <sup>22</sup>Manara, lohohmomba os ona, manimani besalangas lohvra tovolnana. Wo eva indkoklamba si osva undmisasa vewol vivramoa, tovolhuiva novnamba nonglalmba.

<sup>23</sup>Manimani memba honamba lairduv sembayangnamba ambo nom lehvrowol vev, nom ten nalohvm senakembella, wo beswonamangas vewol vivna tatatovolnamba. Wo heva os manimani nomba temba senakembelliniva, ten lehrava lohv, heva noi besal lohvra tovolnonoana, wo henga nomba kuvhoavra tatatovolmba. <sup>24</sup>Kristusva sihamba owai vena kulohol vuheramba, indhana hev englana vinamba hona petharava. Himba sihavongo vena senakembellangas. Heva os himba doa daipotava

di av Sesoana novra, pim kolvrowolalm. <sup>25</sup>Sembayang andranindna kuwulangas vesiha velohvna no kuloholnonoarava huiva petharava, os no tahonnam mongawulm. Himba longaisiha velohvna tovol, nomba tovolva hevnamba owai. Wo heva os Kristusva vonganamba senamba, himba hevmba wuraohowovnamoa Sesoamba elsusva.

<sup>26</sup>Himba osva vetava, ata himba elsus kinmba guamona vevta, doara doa pethava os vena, venamba, daipota men. Wo heva os doa Kristusva mongawulmangas prona. Himba ambo lehra hona nambainam prona, pimba kilumb shuawolalm. Himba hevmba pimba ophunna, dahalm pina indkoklam poswol vinilm. Manara, doa murapeta vev, ovi pethaiva imhara evhowolalmba.

<sup>27</sup>Indhanamba indakonda dalv. Sismba osva indhanarinimba dahavrava, hembra nomba wetatmora lesvhueivra. <sup>28</sup>Wo eva osta Kristusva himba hevmba mongawulm holvoraohna Sesoamba nihnahonam, indhanana indkoklam poswol vinilm. Wo himba henga si sismba provav, heva os indkoklamba poswol vinilmba owai. Himba si provavpa hengava, wohlophshalm, nom ten henoi nengvilivm hem.

#### Kristus Pimba Kilumbshuawol Vena.

**10** <sup>1</sup>Lohohmorava ambo pimba naengho vriv aenisongolmsna, nomba manimani si besalva phovavpa sewonamba Kristusnanamba. Heva os lohohmomba mani nihnamolnamma, osva ora, noi pimba si kilumbshuawol vevav. Pimba wiyera av, manara, indhanamba nomba temba hona lohohmosingiva avnamba, no mongawa wevsana tatamba weisang velvohvna, weisumblololmba, no tahonnam no tahonnam osangas. Wo no tatasowamba Sesoamba venalmba, kilumbshuawol venamoa, nomba temba muramba ambnamba, sembayang venalmba Sesoamba. <sup>2</sup>No lohohmomba hembra kilumbshuawol vetava, nomba tatasowava Sesoamba venalmba, si os wohkik vevav, heva os owai. Sembayangnindmba hembra si kilumbshuawol vevav, wo himba si ningvramoa, osva kava indkoklanahonam mendah av, heva os owai. <sup>3</sup>Heva os owai, mendah noi tatasowava viv, wo noinda himba henga nengvhoalvohinv hevna indkoklam no tahonnam, no tahonnam. <sup>4</sup>Manara, owainonoa, es eva memena sapiaralna tovolva indhanamba kilumb shuawol vevav, osm indhana windel Sesoana novrava.

<sup>5</sup>Noinda osva nonamba Kristusva provnamba petharamba, hev omnana Sesoam,

Yimba nengvmoa, osva tata lu, noi kam wuweihimnu,  
weisumblololm suwera. Yimba nengvmoa, osva kam dambroh  
vivm innenna.

Heva yimba kam kikih vrena nihm, yem engalm. <sup>6</sup>Tanam, yimba indk vithinvmoa, osva tatamba suweramba wohwuweihimnilmba, wo eva

nonamba indhanamba kilumbshuawol velmba indkoklariniva <sup>7</sup>Heva os kava os ona, Sesoa, nonglo, kava men prov. Men novol velohv kamomba tombaira,

Kana Sesoa, kava doa prona, velmba, nomba yimba temba  
nengvpa.

*Buk Song 40:6-8*

<sup>8</sup>Hona doaramini Sesoana tombaimorava, himba seilmba os oi, yimba nengvmoa, osmba tataoa kamo suwera moa wohwuweihimnu, eva innenna oa kam dembraho. Yimba nengvmoa, suwera mba sengalmba, nonamba indhanamba kilumbshuawol velmba. Honamba andrava memba Mosesna lohohmona moara, heva os Kristusva doa nemelm pulphona wevsava. <sup>9</sup>Wo eva hev henga onam, men kava. Kava doa prona, velmba, nomba yimba temba undva vrevpa.

Men osm, pimba daipota hona moara lingillihev, Sesoava doa wohnombovhoana doaramini wevsamba, nomba manimani temba suwera wohwuweihivnamba. Osm vena, himba henga nemelm pulphovna wevsava. <sup>10</sup>Yesus Kristusva wohvena, nomba temba Sesoava nengmanavnamba, hembra velmba. Wo noinda honamba pimba kilumbshuawol vena, osm Sesoanangas avra, hev m he ophonam nihnahonam. Kristusva hona andrava vena mongawulm, wo yunalm wohloholm.

<sup>11</sup>Kivrahui sembayang andranindva viv, hevna andrava elnitra viv elsva. Vivpa, henga vivpa, os manimani suwera wohwuweihimniv Sesoamba. Wo heva os no manimani temba vivpa, owainonoa, indhanamba kilumbshuawol vevnamao. <sup>12</sup>Wo heva os Kristusva hev m kihopiana nihnahonam mongawulm indkoklaramba, osm si noi yunalm eukwonamba lohva, indhanamba kolvrowolalmba. Wo doa himba av Sesoana nihananglasis. <sup>13</sup>Wo daipotava Kristusva di nengvewolowov, osm Sesoa aral hena ungundmba si slowothovav hena englisram. <sup>14</sup>Kristusva mongawulm dahana, wo hona monana himba kekaiv vena, wuvolwonam alm yunalm, nom ten avnam Sesoanangas.

<sup>15</sup>Sesoasongolva eva ishunnata pimba honamba. Seilmba himba os ona,

<sup>16</sup>Mendekliva os ona, dawonamba sewonamba kava si honi  
wonomokalthavav nemelmomba Israelnindmba. Kava kavna  
moamba si yihinvra hena indmera, wo kav si novol vewol vivra  
hena mira.

*Jeremaia 31:33*

<sup>17</sup>Wo henga hev ona,

Hevna indkokla, eva manimani noi sahoklal hev vivnam, ata kava  
nengvavmoa nomba monglamba.

*Jeremaia 31:34*

<sup>18</sup>Doa indkoklamba Sesoava maikumi vewol vena, noinda hengava vivavmoa andrava, indhanamba kilumb shuawolalmba.

### Osangas Keknam Wohamnavm Sesoamoa.

<sup>19</sup>Seh, Sesoava doa pimba kilumbshuawol wohvena, noinda daipotava pivva wuvolva av, saivolmangas Sesoana kulohol vuheram. Yimba honamba vivra pepehhuiva, manara noinda Yesusna tovol dahallinira. <sup>20</sup>Pivva manapenam saivvav nemelmonana, nona ten Yesus velevhueinnam pim, hona monanam yunaln wohalm. Honamba nemelmonamba wohdihelsihangav no kayenmeram, nomba kayenmba ten lengkleiha lohvpa no vuhena tuvmsna. Nomba kayenmba Yesusna nihm woholhv.

<sup>21</sup>Wo pinamba sembayang andranindriniva mendeklimsna luhunv Sesoatindinamba. <sup>22</sup>Wo doa pioa muram apelpawohara, keknam undnahonam amnalm. Manara, pimba doa windelangas av, tovol velanglalnana. Noinda pivva osva ningvavmoa, pinamba indkoklava luhungu vinv. Wo pina nihva doa poswol vina po dendalna. <sup>23</sup>Pivva eisholohv pivna undm, eva pivna manam manam besalm, nom men piv nengviluwuv. Manam pimba pemba mumusva angavra. Pimba nonora av, manam manam Sesoava doa ona, velmba, tanamolnam himba wohvev.

### Pioa Keknam Nengmanalohra, Velm, Nom Hev Ten Wohonom.

<sup>24</sup>Pioa longong vewol velohra nom, osm hem nom, hem nom, eva kolvrowol velm hem, osm os und avramana vevm hem nom, hem nom, wo eva vivm beswonamangas. <sup>25</sup>Manam yimba pevmba ollavav, nonamba kusovpa owapevpa, sembayang velmba, osva temba indhanamba monglava vivpa. Wo heva os yeoa mongawatilm kusovm, wo eishoraohv monglamoa, keknam alm. Vewuvmona vevm honaoa elsus osangas, manara, yimba nonora av, nambaiva mendah ten prov mendeklinamba.

<sup>26</sup>Pimba doa numhowol vina moanonoanamba, wo pivva sahonamba allava hengava, owai, hengava lohvmoa monamba, pimba kilumbshuawol velmba. <sup>27</sup>Owai, lohvmoa, heva os pem viu, aevulmanalmba wetatmomba, eva suwekoklam, noi ten si muhawol vevm hindm, nom ten he ahnam lovahwolvm Sesoamongo.

<sup>28</sup>Yimba nonora av, himba nomba nengvmoa, engalmba Mosesna lohohmomba, nunglivna, himba indkokla vev, wo muserava os nunglivna sambla indhanaka, samblamong indhanaka. Wo hembra manam wavra vrvira, hemoa wohhelvakomandhivm. <sup>29</sup>Wo noinda es yimba ningv, vinvrama indhanamba, nomba himba temba Sesoana ombolmba ningminivmoa? Himba nungliv tovolm Kristusnamba, nom ten lehvravm Sesoana moam nemelm. Noi tovolva hembra doa nemelalm nilheinna, heva os himba nungliv, os indhanarinina tovolnonoa. Wo osva himba

indkokla vrevna Sesoasongolm, noi ten pim wavra vovhueinvm. Tanam himba si vravav mendeklinonoa kinmba.

<sup>30</sup>Pivva nonora av, Sesoava os ona,

Kava si bui vewol vevav, nomba temba tetevul vrivpa. Kava si esesm vinvav hembra. Wo hev vena, os ona, mendekliva si hevtindimba lesvhoawol vevav.

*Lo 32:35-36*

<sup>31</sup>Indhanarinimba wetatmorava waiishovrava mendekliva, wo himba si pemba esvema vevra nonamba, Sesoanapenamba, ten wohavm yunalm.

<sup>32</sup>Heva os yeoa ningvm nom nambaim doaraminim, nona seilm pev ten avnam hona moanonoana. Nonamba yeindamba kinmba esvema oprinvna, wo yemba mindnam almangtomosa vrevna. Wo heva os yimba lo bombothoprana, honamba kinmba levralmba. <sup>33</sup>Mongnanamba yemba vevna, velanongla vewol ovuvna indmosera. Wo mongnanamba yimba wonvivna pevna mongawa Kristusnindm, himba eva sna kinmba doa dumbnata.

<sup>34</sup>Wo osva temba yimba kolvrowol vivna indhanam buinindm, pevna mongawa Kristusnindmba, wo yimba doa losnamona avna, noindava manimani yimba temba ianamba, wo doa yenaminiva vrepiana. Manara, yimba ningvna, os kanamba manimani besalva si nalohvav yunalm yunalm, muisowa vepehui senakembellava.

<sup>35</sup>Wo noinda osva manam yimba maivithivra nengavnangva, nomba yimba temba seilmba engivnamba. Mendekli lohv, yemba esesmba vinilmba hona andrarava. <sup>36</sup>Yea wohkek vithu, wo yimba osva nomba beswonam vivra, Sesoava temba nengvpa. Wo osva yimba dombolvav, nomba hevpa temba wohonamba. <sup>37</sup>Manara, os novol velohv,

Mani wenokombawonamma, mongova temba prolmba vevpa, si provav. Himba si wenokombo vevavmoa. <sup>38</sup>Indhanariniva nomba temba kava nonglavpa, osva lehrangas av, si himba beswonam avav. Manara, himba keknam undnahonam amnav kamba. Wo heva os himba pepeh vetava, wo henga mumus gavra, kava si indk vethamnavavmoa hembra.

*Habakuk 2:3-4*

<sup>39</sup>Wo heva os pimba snamba owai, temba himba pepehva vevpa, wo owolakohav. Pivva indhana, noi keknam undnahonam si avavm, noi si wohlopshavavm.

### Undnahonana Plalva Mani?

**11** <sup>1</sup>Undnahonamba osm uv, keknam amnavm manam manam, nom ten piv ningvm, Sesoava ten hev ovrahunnam pim. Wo undnahonam vei, osm levrapiivolalm, nom manam manam, ten piv novna nonglam owai vivm, nihnamolnonoam. <sup>2</sup>Indhanamba nemetva temba anamba, Sesoava indk vethinvna hembra, manara noinda keknam

undnahonam avnam. <sup>3</sup>Pivna undnahonara pivva nonora av nomba, osva vavawonamba pethava lohv Sesoana moara. Honamba memba, osm nomba pimba nunglivpa, vena mana vemana, es eva nunglivav.

<sup>4</sup>Apelva keknam undnahonam lohmanavna Sesoamba, wo himba Sesoam tata wohwuweihamnavna, nonam sembayang venalm. Wo Sesoamba wohkanandhavna nihnahonam Apelna tatasowarava. Wo heva os Sesoava Keinnamba puehalla velahavna innesowamba. Manara, Keinva hembra undnahonam lohmanavnamoa. Wo honinda pivva osva wiyera av, Sesoava Apelmba os omnana, besal indhanarini. Apelmba doa doara dahana, heva os hena wevsava mendah pimba numhowol vavov.

<sup>5</sup>Hevna undnahonara waivolna Enokmba senakembellamba. Hembra dahavavmoa. Wo hembra si nunglivavmoa, manara noinda Sesoava hembra doa waiwohgana. Hembra os waingana, Sesoana doaramini tombaimomba os ona, himba indhanarini, he doara vavovna, osmba Sesoava und kanandhav. <sup>6</sup>Heva os undnahonahuirava, an eva vrevav Sesoamba, osva noinda undoa lothora, owai. Himba nomba prolmba vevrava Sesoaindamba, undnahonam keknam lohvra, wo himba keknam nengvra, osva Sesoava beswonamangas vewol vinv indhanamba, nomba temba hembra aslalvpa.

<sup>7</sup>Hevna undnahonara Noava hellena Sesoana ongawolmomba nomba, osva manam manam mendah nonglavmoa. Himba wohengvna Sesoamba, wo bot mendekliva kueindinvna hevna ongatowondalmba, hembra lopshalmba. Osva himba museram amballam pethanindna wevsam wulphunvna, osva doa sahoklal av. Wo hevna undnahonarava, himba nilhavna sna indhanarinielm, ten lehrangas lohvm Sesoana novra.

<sup>8</sup>Aprahamba keknam undnahonam lohmanavna Sesoamba, wo mongawa aong hellena, mongona petharamba galmba domba, Sesoava temba doarava wohomnanamba, vraholmba. Himba hevna pethamba wuleihalaphona, himba hevpa mendah tit vevna, osmba hem kava gav? <sup>9</sup>Heva os ambo undnahonara osva himba avna no petharava, Sesoa doara wohomnanam, wohvrahalm. Himba diva os avna, ovna, ilonindrini, kembelnindrini owai. Himba avna lairduvra, wonavna Yakopim Isakim, himba eva noi mongawamoa evrena Sesoanamba, pethamomba.

<sup>10</sup>Aprahamba keknam undnahonam wohnengvelowovna kota mendeklim, si noi wohlohvav yunalmba, nom Sesoava doara vena, nengavnang vrena, wo osoa eva doa wohvena nomba. <sup>11</sup>Hembra doa mundkola vevna otolhui, wo Saramba eva osta, snal eva ata otol lengla veta, owai. Wo Aprahamba hevna undnahonara Sesoava vrena, osm keknam lohalm aralm. Manara, himba keknam nengmanavna Sesoamba, venalm, nom hev ten waiishovnam. <sup>12</sup>Hona indhanariniva mundkolalnonoa, doa hembra mura dahalmba vevna, wo heva os henamini phovna esvemava simbepolva, osva memba paiva ovrava lohvpa. Himba os av, os men engal, an eva sevelvav si, owai.

<sup>13</sup>Honamba indhanamba himba keknam undnahonam amnavna Sesoamba, wo hemba os sihana. Himba dumbnamoa hona petharava, nomba temba Sesoava ovrhunnamba hevtindimba. Wo heva os himba os ningvna, kavna manimani si sewonam dawonam naluhunvav senakembellava, wo os indk vithivna. Himba os una, kava hona pethanindva owai, kava ilonindmsna ahalloholnindmsna av huiva.

<sup>14</sup>Nonamba indhanamba sna moamba eishovpa, wo pimba nungliv, osvna himba aslavl petham os hevelm, no pethava wohdihelinlav. <sup>15</sup>Himba hengava ningtava hona pethamba, himba henga lelga veta, heva os owai. <sup>16</sup>Wo heva os no indhanamba temba nengviliv besal kembelmba, senakembel. Noinda Sesoava louva vevmoa, osvna sevra ovrivpa hembra, kana Sesoava. Himba doa pongvhueinna kembelmba hembra.

<sup>17-18</sup>Sesoava Aprehamba os omnana, simbepolva yenamba si phovav Isaknaminingas. Heva os sismba Sesoava Aprehamba lehmanavna, osm ora kamba keknam undnahonam ambo tanam lohmanav? Hev omnana, yeova pevna ombpovmoa mongawa powolamoava wohweisumbowomnora kam suwera. Wo Aprehamba osm ona velm vena, ten Sesoava omnana. <sup>19</sup>Aprehamba keknam undnahonam os lohvna, Sesoava si pokamariniva henga wolaihaphovav hembra. Wo heva os Sesoava henga ollana hembra, hevna ombolmba kovhoalmba. Noinda pimba olhmonamba olhinv, osvna tanam Aprehamba hevna ombolmba pokamarinimsna omnana hengava.

<sup>20</sup>Undnahonarata nomba temba Isakva awothowolnamba, luhunilmba Yakopi Esauimba sewonamba. <sup>21</sup>Yakoppa undnahonam keknam lohvnamba, osvna himba awothowolna Yosepna ombolsamblamba. Himba honamba nonam vinna, hevna dahavnam. Wo doa hevna alasra ku holothonamba, Sesoava sembayang venavna. <sup>22</sup>Wo hevna undnahonara Yoseppa ishunvna Israelnindmba ovalmba, osvna yimba si pulvovav hona Isippethariniva, nonam ongopievnamb eunillam. Himba ishunvna hembra, osm, os viu kana kelo.

<sup>23</sup>Hevna undnahonara Mosesna araravalva elengkomandhana hembra samblamong weisramba, os nonam lingvinamb. Os enonglavnamba, besal hevna lingilv otolva. Wo himba pemba evevnamoa, king kuwulna moamba pilpikoholmba, nomba himba temba doarava wohtvnamba, helvakomo vewuvulmba tuendismba. <sup>24</sup>Wo hevna undnahonarata Mosesva lohna, os venamba, mendekliva venamba, ovunna, kamba sevra ovrilmba, osvna king kuwulna molna ombol, Isipnindna. <sup>25</sup>Osvna himba hevmba pusvundthoana, kinmb wongoalm Sesoatindimongom, galmoa lohna monakoklaramoa. Himba nengvnamoa, wevsa sahoklalmba engalmba, wo nomba osmba ambo daipotamangas deswuhavra. <sup>26</sup>Hev nengna, besalva men loum vralmb Kristusnam, eva dombolmb wohmb besalmb Isipnindnam, owai. Manara, himba nomangas nengvnam, manimani ten Sesoava dembraholm vevmb hevmb.

<sup>27</sup>Wo hevna undnahonarata Mosesva phona Isipriniva. Himba nengnamao nomba king kuwulna daosmomba. Doa mongova nonglanamao Sesoamba, heva os Mosesva keknam andrava wohvevna, os maim ovna, himba doa nonglana hevna novna Sesoamba. <sup>28</sup>Wo hevna undnahonara Mosesva laus vrevna Pasovatihmba, wo unna Israelnindm, yeoa tuvmoa tovol velanglalna vinu. Memba osm vevna, ovsongolnindriniva himba nomba sihavrava, ata helvakomo vevramoa yivaltowondmba Israelnindnamba.

<sup>29</sup>Undnahonam avna, noinda Wan Aembulmba lovol vena, os maim ona, petha monam. Isipnindva eva himba lehalm vivnata, heva os owai, hembra nepola vilona. <sup>30</sup>Undnahonam Israelnindva keknam avnam, nomba pueilva Yerikoriniva os tetga vina. Seilmba boasna himba angavnamba, weisming vruwuvna amballava, mongawa mingu osva venamba, honpul noi tetga vepena petharam. <sup>31</sup>Hev undnahonam avna, Rahappa, himba monarini ambo avna, himba beswonam pepavena nongendwolnindrini samblamba, wo hembra helvakomandhinamao no indhananahonamba, temba Sesoamba engamba owai vivnamba.

<sup>32</sup>Hengava kava yemba monglamba moamba ishunvavma? Kanamba mindnamba nambaiva olohvmoa, yemba ishunilmba honamba, vei Giteon, vei Barak, Samson, Yepta, Devit, Samuel eva moashulnind. <sup>33</sup>Hevna undnahonara himba daosva ohomana vevna, osva hindmongo, hindmongo, wo hengas snapolmoa kuvhoawol vina. Himba noi vivna, ovna, memba lehra, wo osoa dumbvna, nomba Sesoava temba ishunnamba. Himba laionna lomengmba kulthoawol vinvna, <sup>34</sup>suwem mendeklim vuthoawol vivna, wo beswonam eva ahallohvna ovlakasnapenamba. Hembra oi vilovna, wo heva os henga kepel vovhoapravna. Diva himba daosva keknamangas ohovna ungundermongova, engilangavna.

<sup>35</sup>Heva os monglava indhanamba dalvna, henga phosohvna, wo os hena avahumunilva hembra henga wulengu vevna. Monglava nengnam ambo nunguth vewol vivna, unvna, yeoa Sesoamo nombolvhueiu. Ata yemba kava osrava nombolvhueivav beswonam. Heva os owai, himba ningvnamao nomba. Manara noinda himba ningvna, kava si henga mindilva kavna nihna phosohvra beswonam. <sup>36</sup>Wo monglava losgoplala unvna, wo helvawol vivna. Monglamba wena ningewol vivnamba, buira wolasuv vevna. <sup>37</sup>Wo monglamba honna helvakomo vivna, wo monglamba hovrahovra kokowol vildavna. Hem vevna, ovlakasma helvakomo vivna. Monglava sipsipna memena tovol vevravna pikianalmba, noinda mani ata ovrvta. Himba innehuinind, hembra indkokla vewol vivna. <sup>38</sup>Pethanindva beswonamba hembra nungeilvnamao, heva os Sesoana novrava he miva lovahv. Himba ambo ahallohvna, os sahalpetham, oloram, honmeram dom euvmona velm, eva pethameram.



<sup>39</sup>Nomba indkumbiva indhanamba, undnahonamba temba amnavnamba Sesoamba, wo himba dumbvna besal nihilva Sesoana novrava. Wo heva os heriniva mongova vranamoa, nomba temba Sesoava unnamba, mendah. <sup>40</sup>Manara, Sesoava nengavnangva vrena, mana vemam daswolalm pimba besalmangasm. Wo himba si avav beswonam, wo heva os pimongo mongawulm, Kristusindava.

**Yeoa Naongla Vrivm Yesusmoa, Wo Wohvivm.**

**12** <sup>1</sup>Pimba best eva indhanamba nunglulavma, pimba doa pulningewol vina, wo himba pimba titihowol ovuv. Himba nomba temba doarava keknamba undnahonamba avnamba. Noinda hena wevsava eishunv pimba nom, osm, undnahonamba osm uv. Wo noinda pioa eva dandwonam angalohvra, no monaramoa, Sesoava pimba temba unnamba, alhmana velmba no monaramba, wo eva kivrawuliha vrivramoa. Wo noinda osva pioa wuleihalohra mana vemakoklava, temba pimba kekaiv vevpa, ata osva pivva dandwonamba angavavmoa. Wo pimba osva beswonam tingeswulvra pivna indkoklamba, nomba temba pimba kekaiv vevpa hengava. <sup>2</sup>Pioa ambo naongla vrelohra Yesusmangas. He pinamba keknamba undnahonamba almba sonovhueinna, wo himba pimba vinvna, osm keknam ara hevna velgona. Yesusva kinmba guana, krusera wikleihivnam. Wo heva os himba wohvra vna louva kruserava senamba louhui. Manara, himba nengna, ona, Sesoava si kamba indk vethalmba vraohvav sewonam. Wo daipotava himba Sesoana nihanasis king kuwulna vuheramsna av. <sup>3</sup>Ningminivm Yesusmangas. Himba nengnamoa nomba, nonamba indhanakoklava sahonamba indkoklawonamba hembra vinivnamba. Nunglivm Yesusna wevsam, osm yimba si nona keknamba avra, eva mana vemava yemba wiki vewol vevra.

**Sesoava Snal, Oi Ara.**

<sup>4</sup>Yimba pevna indkoklamba wuleihalm viv. Noinda kava olhmomba olhv, osva yimba pevna indkoklamongo daos ohov. Heva os hona daosrava yenamba doava yemba mongova dahavmoa, osva tovolva pihavmoa. <sup>5</sup>Yimba doa maivethakovna Sesoa arana moamba, yemba suwenamandna vewol ovolumba,

Kana towand, manam yimba ningvav, osva mendeklina moamba, novnavhoramba velmba, ambo ombam, owai. Wo manam yimba wuleihivav, lehawuvulmba, nonamba Sesoava yemba sishona vewol vevpa. <sup>6</sup>Manara noinda mendekliva sishona vewol vev, nom hev ten keknam und vewol vevm. Wo himba bui vewol vev indkumbimba, nomba himba temba unvpa, hevtindilmba.

*Sindaun 3:11-12*

<sup>7</sup>Wohdumbvm pevna kinoa, os maim uvra, arahumunpev yem ten vinvram. Sesoa honamba manam manam vinv yemba, os oi, aral vinv hevna otovotalm. Otovotalmba hevna arahumunilva bui velahav. <sup>8</sup>Otovotalmba yunalmba wohbui velahavm. Yemba bui vewolalmba owai vetava, yimba besalva tanamba otovotalva owai, yimba maim oi, timingrini.

<sup>9</sup>Pivva huiva petharava avpa, ararangas he pimba bui velahav. Wo pimba pivna aramba beswonam longong vewol viv. Wo noinda osva memba mendekli, nomba buimba pimba vralmba pivna aranamba senaminirinamba. Pimba honamba osva vellava, pimba si osva undna avav. <sup>10</sup>Pina arahumunmba honamba pethariniva bui vewol viv pimba, nonam piv eusil mendah ahalvm. Himba pimba nona bui vewol viv, hev ten os ningvm, memba besal honamba. Wo heva os Sesoava pimba bui vewol vevpa, pim kolvrowolalm, osm pimba osva avav helmangas besalangas, os hev ten avm. <sup>11</sup>Pimba und vivmoa buimba. Buiramba lilmba nihsesoa vev. Wo heva os sewonamba sismba pimba sungeipilalga vevra buiriniva, pivva avav beswonam, manara, pimba doa kovohlavra, beswonam alm besal monam.

#### **Vivm Novnavhora, Es Yimba Av.**

<sup>12</sup>Buiramba lilmba besal, manara, monglava yemba doa oi vehawol vena. Keknam kel wosapro pevna henga. <sup>13</sup>Wo avm besalmonam, osm yemba si lopshawol vevav, wo oiva nomba yenamba si yemba kekaiv vevavmoa, owolakovolmba. <sup>14</sup>Lihvm, beswonamangasm alm indkumbimongom, wo eva viu, lihvm, alm Sesoalmangas. Henomba Sesoalmangasva beswonamba lohmba owai vevrava, himba si owaimomolmba nonglavavmoa mendeklimba.

<sup>15</sup>Pevmoa novnavhora vivm, ata mongo indkokla vevra, wo noinda himba Sesoana wavrava ata homeis nengvramoa. Indhanariniva lohollava snamba, himba si yemba monglamba wohindkokla vewol vevav. <sup>16</sup>Novnavhora vivm, ata anvema nihtov kovopethavav ongariskuire. Novnavhora vivm, ata mongo ora vevai, os ten Esau nemet venam, os Sesoamba nengmanavnamoa. Esauva etel, wo manimani he vaohothovav hevna aralnamba. Wo heva os Esauva hevna boasalalm Yakopm omnana, ye daha pivna aranapuwulua vaohotho, kava owai. Wo Yakoppa hembra no nungnam inne dembrahona, nonam nelm mongawulm. <sup>17</sup>Yimba nonora av nom, osm sismba Esauva honamba vena, himba nengvna, dombolm aranapuwulm. Himba nengvna honamba mindnam, wo wovevna, noinda himba os nengloh venamba, nom weihaloh vrelm, hev ten venam, heva os owai.

#### **Pimba Indkumbiva Sesoana Yivaltowondmsna Av.**

<sup>18</sup>Pimba senakembellam angav, Sainai oloramba owai, osva temba pina tomonalva vinamba nemetva. Yimba vonganamoa oloramba,

osmba yimba pevna englana tuhvav, wo nomba yunam suwe telahavna. Yimba doava sikulmerava saivnamoa, temba wohkilvralohvpa, eva vuvi mendeklirava. Pina tomonalna wevsa, himba os pulvona Sainai olorava, Sesoamba hellelmba. Heva os pimba owai daipotava. <sup>19</sup>Himba vuvm hillivna Sesoanam. Nonamba himba hillivnamba weitva, himba nonakulm wohhillivna Sesoana moalamangmba, wo himba pemba os vivna, i. Hev Mosesm umnina, es, Sesoam os omno, kava hellelmba vivmoa hembra. <sup>20</sup>Himba ningvnamoa, moamba nomba hellelmba. Osva indhanariniva tuhvava olomba, hem nomoa wohmiklivm honnangas, eva tatamba osoa osta. <sup>21</sup>Mana vemamba himba temba nunglinamba, saholalnonoa, os Mosesva ona, kava pem venamba, kamba woheisna.

<sup>22</sup>Wo heva os yimba ambvmoa sna olorava. Nemel olomba memba yimba ambvpa, olo Saion. Yimba doa ambv Sesoana mendeklikembel Yerusalem, di dihelv senakembella, Sesoava ten noi yunalm wohavm. Yimba dom ambv, di 1,000pelara ovsongolnind kusovnam mongawulm indwonamangas. <sup>23</sup>Yimba doa eksuwulprana Sesoana yivaltowondna moaramba. Hena nonamba nihilva di novol veluhunv senakembella. Yimba doa ambna, domba temba Sesoava no vuherava lesvhoawol vavovpa indkumbimba. Wo ye vena, doa ambna besal indhana songoramba, hem ten Sesoa doa lesvhoawol venam, unna, yimba indhana windel. Wo noinda doa himba beswonam av. <sup>24</sup>Manara, yimba doa pepavena nihra Yesusinda, henoi ten nemelmoa wulprunnam Sesoanamini hevtindim. Yimba doa saivna Yesusna tovol velangallava, wo no tovolmerava Sesoava moamba besal ishunv pimba, wavramom. Snamba owai, temba Sesoava Apelna tovolmerava ishunnamba, esesmba.

### **Pioa Sesoana Das Owolmomoa Hellellohra.**

<sup>25</sup>Wo doa novnavhora vivm, manam yimba aongva nukun vewol vivra, nonamba Sesoava ishovrava. Tomonalva kongswul vevna, hellelmba hembra, nonamba Sesoava hembra ongawolvnamba petharava. Wo Sesoava kinmba plothunna hembra. Daipotava Sesoava ongawolvna pimba senamini. Osvava mana vema si pimba ongolohvav, pivva aongva nukun vewol vitava, pimba si esvema vinvra kinmba. <sup>26</sup>Nemetva nonamba himba ishovnamba, hena moarava pethava daihavna. Wo heva os daipotava himba doa moamba ishona,

Henga kava si vevav, osva pethamangasmba owai, daihavavmoa,  
ovnahonam daihara.

*Hagai 2:6*

<sup>27</sup>Hona moamba henga pimba novpa wuleihinv, nomba manam manam temba venamba, si daihaprarava, wo hoai vilovav. Osra manimani nomba si daihapramba owai vellava, nongas si wohlohvav beswonamba. Manara, Sesoa hev kekaiv viav.

<sup>28</sup>Wo noinda osva pioa olohmanara, os, yimba lehra, manara noinda pimba si wohavav Sesoana nemeltindirava, osm noindava

indkokla vilovavmoa, hoai vilovavmoa. Pioa sembayang vewuvmona velohmanara Sesoamo, no monana himba ambo und kanandhavra. Pioa hemoa okolalohra longongnahonam pepehnahonam. <sup>29</sup>Manara noinda pivna Sesoava snal av, maim oi, suwe tav, noi ten manam manam wohtelahavm.

**Pioa Indakonda Nesmos Avramana Velohra Pivmoa.**

**13** <sup>1</sup>Yimba Kristusnindva, yeoa nesmos avramana vevm henom henom mongawa pendarinimsna Kristusnind. <sup>2</sup>Ningvm, deisumbisuv velm ilorinim pevna deuvram. Monglava indhanamba doa vina honamba, deisumbisuv vena ovsongolnindmba maim titnam. <sup>3</sup>Manam yimba numbulvav, nomba temba buimerava aevulvpa. Nengewuvunvm hemoa, os ovra, kava kav aevulv buimerava mongawulm. Ninginvm hem nom, ungunnd ten indkokla vewol vivm, os ovra, kamba eva osta indkokla vewol vivta.

<sup>4</sup>Onganungmoa longong vrvira indkumbioa. Tlal ongal hevna evrowolalmoa, hengava manam emuksawoksava evevav. Sesoava sesm si vinvav hindmba, nomba temba iaindavpa ongariskuirava. <sup>5</sup>Pevna almoa beswonam sungiavhoapro, dimba muemb hlalmba. Wo nona yemoa wohkanandhawol vevra, ten pev noi wulavm. Sesoava os ona,

Kava si yemba nombolvrmoa, kava si yemba mai vevramoa. *Lo 31:6*

<sup>6</sup>Wo pivva osva ningv, tanam, wo uvra,

Kava si pemba vivramoa, manara noinda mendekli kamba kolvravra, indhanamba mana vemava kamba vinivrava. *Buk Song 118:6*

<sup>7</sup>Ninginvm pevna mundilm mendeklim. Himba numhowol vivna yemba Sesoana moana. Ninginvm, es himba avna, wo es hembra sihavna, wo hena undnahonam alm ninginvra, os ao yeoa evata. <sup>8</sup>Yesus Kristusva eva osta luhunv pimba, om, detim, wo osangas yunalm.

<sup>9</sup>Manam yimba nihva wuleihinav indhanamba, yemba numhowolalmba monakoklaramba. Yenaova indoa wohlovahinvra keknamangas, Sesoana wavranangas, innena wevsamba hlalmba owai. Snamba engalmba lohohmomba, owainonoa, mongomba indhanarinimba kolvravavmoa.

<sup>10</sup>Pinamba luhunv altasengmsna, memba Yesus hev. Wo heva os Yutanindna sembayang andranindva, himba nomba andra vevpa no lair sembayangdumvera, himba nevavmoa nominiva hevpa. Memba olhmomba olhinv pimba, osm Kristusva hevm wuraohna, dahalmba pina indkoklaram. Wo honi henga wohkuvhueinna Yutanindna tatasowamba.

<sup>11</sup>Yimba nonora av, kuwul sembayang andranindna tata tovolva longaisiha vev domba meramba kuloholnonoa vuheramba. Wo di himba dembhamnav Sesoamba, indhanamba kilumb shuawolalmba. Wo heva os nomba nihilva di ambara wohweisumbololowov ehalla. <sup>12</sup>Wo eva

Yesusva os wukleihinata amballa kotara Yerusalemrava. Hembra dahana, hevtindim Sesoalmangas alm hevna tovolnanam. <sup>13</sup>Wo noinda osva eva pioa hem patvlohma nara elsus, loum vramnalm henam. Pioa eva os vralohrata mongawatovna, Yesus ten vranam.

<sup>14</sup>Manara, huiva petharava pinamba luhunvmoa, yunalmba dihelalmba kotava. Heva os pimba aslav kotamba nomba, osmba sewonamba noi si pimba yunalmba wulaevvav. <sup>15</sup>Wo noinda osva elsusoa pioa Sesoam okuluvmona velohra. Memba pivna okolal phunv pivna moarini, ten piv sevara ovrivm hem, os Yesusva mendekli lohv. Memba pina Kristusnindna tatasowamsnamba luhunv. <sup>16</sup>Manam yimba maivithivav, beswonamba vinilmba mongnindmba. Wo wonamong vevm hemoa, yimba nomba iaevulvrava. Hona wevsara Sesoava indk vethav.

<sup>17</sup>Wohengalvohmana vevm pevna mundil mendeklimoa, wo ambo vinvm hena keusingi taivwonam. Hona indhanamba novna vewol viv yemba, noinda hena andrava luhunv, yena indmba novna vewol vinilmba. Wo Sesoava si henamba lesvhoawol vinvav. Wohhilwulvm hemoa, osm himba wohvivra hona andrava indwonam, duuswonamba owai. Si yemba owai honamba kolvrowol vevavmoa, yimba kinmba hembra pelhola ovunvrava.

<sup>18</sup>Wohvewuvunvm sembayingnaoa kamo. Kava ningv, osva tanam nomba manam manam, memba kavpa vildavpa, manara, kava elsusm manam manam vilangalmangas besalm viv. <sup>19</sup>Wo kava yemba keknam ishunv, os sembayingnaoa ambo lotholohvra, osm Sesoava si henga wolaihaprinvav kamba yemba lilnam.

<sup>20-21</sup>Kava sembayang vev, osm Seso si yemba vinvav, osm yimba wevsabesalna avra, wo yimba vivra, nomba osva himba temba undva vrevpa. Sesoava noi, pim ten sandhavam, indwonam alm, himba noi, ten wolaihaphonam pokamarini pina mendeklim Yesus Kristusm, mendekli sipsipna kekalvhonindrini. Sesoava wolaihaphona hembra, noinda tovolva hevna dahallinira. Henamba tovolva pinamba novmba wuleihinna, osm Sesoana moamba tanam, nom Seso ten wonvenam hevtindim. Wo hona moamba si mueisova vevavmoa yunalmba, wohloholm, nonapopolm alm beswonam.

Kava sembayang vev, osm Sesoava Kristusnashara si vinvav pimba, noindava himba indk vethavpa. Wo eva Yesus Kristusnanamba himba pimba indkumbimba daswolvav no wevsana, hev ten und vevm, wo elsusva pivva hembra okuluvmona vevra. Tanamta.

### **Eunilmoa.**

<sup>22</sup>Seh, kava yemba os ninginv, keknam beswonam hillivm hona moam, men kav novol vinvm yem, suwenamendna vewol ovovm. Wo heva os honamba memba tombaiva hutemothol, mani tokolma. <sup>23</sup>Kava yemba

osm vinv, yeoa nonora aevulvm, osoa pina boasalalva Timotiva doa pholahaphona buiriniva. Wo himba protava lelnamba kaindamba, kava si osva mongawulm epravav hei, yemba nongalalmba.

<sup>24</sup>Ishunu kana sehmoaoa indkumbim kuwulm mundilm pevnam, eva indkumbim Sesoatindim. Eva osoa vei, noi Romnind Kristusnind himba yemba piembinv sehmoa. <sup>25</sup>Sesoaoa yemoa indkumbimoa wavra vewol vevra. Doata.